

02 NOV 1999

Dewan-Ekonomi

DEWAN PERNIAGAAN CINA YAKIN EKONOMI SUDAH PULIH

PUTRAJAYA, 2 Nov (Bernama) -- Gabungan Dewan-Dewan dan Perindustrian Cina Malaysia (ACCCIM) dan Gabungan Pertubuhan Cina Malaysia (FCAM) yakin ekonomi negara telah pulih dari kegawatan dan sedang menuju ke landasan pertumbuhan yang lebih mantap.

Timbalan Setiausaha Agung ACCIM David Chua berkata, kedua-dua pertubuhan itu yakin jangkaan pertumbuhan ekonomi sebanyak lima peratus tahun depan akan dapat dicapai.

Hasil pemulihan ekonomi itu, kedua-dua pertubuhan yakin pengundi masyarakat cina yang kebanyakannya ahli perniagaan akan memberi sokongan mereka kepada kerajaan Barisan Nasional (BN) pada pilihanraya akan datang.

"Prestasi ekonomi adalah satu faktor. Masyarakat cina melihat keadaan keseluruhan dan juga mempunyai tanggapan yang jauh dan yakin sokongan kepada kerajaan akan terus dikekalkan seperti sedia kala," katanya kepada pemberita selepas 30 wakil ACCIM dan FCAM mengadakan kunjungan hormat dan perbincangan dengan Perdana Menteri Datuk Seri Dr Mahathir Mohamad di Jabatan Perdana Menteri di sini hari ini.

Chua yang juga setiausaha jawatankuasa penyelarasan pada pertemuan itu berkata, kedua-dua pertubuhan itu memahami dengan lebih jelas mengenai langkah-langkah pemulihan ekonomi seperti kawalan matawang dan kesan-kesan positif yang dicapai terutama pada pertengahan tahun ini dan untuk jangka panjang.

Chua berkata kedua-dua pertubuhan itu kini lebih faham mengapa kawalan matawang perlu dikekalkan pada masa ini dan juga untuk satu tempoh tertentu.

Katanya, angka pertumbuhan ekonomi yang mencapai 4.3 peratus tahun ini seperti yang diumumkan dalam laporan ekonomi 1999/2000 adalah jauh lebih tinggi daripada anggaran kerajaan.

"Ia boleh dianggap sebagai satu angka konservatif tetapi yang sebenarnya ia jauh lebih baik," katanya.

Mengenai perbincangan dengan Perdana Menteri, Chua berkata kedua-dua wakil pertubuhan itu bertukar-tukar fikiran dengan Perdana Menteri mengenai keadaan semasa.

Katanya, Perdana Menteri turut menerangkan mengenai keadaan semasa dan harapan beliau supaya masyarakat Cina memberi sokongan padu kepada kerajaan supaya dapat bersama-sama terus memajukan negara dan mengekalkan keadaan yang mantap serta suasana harmoni.

Katanya, pada pertemuan itu kedua-dua pertubuhan itu menyatakan sokongan masyarakat perniagaan Cina kepada Dr Mahathir sebagai pemimpin dan berharap beliau terus memimpin negara ke alaf baru.

-- BERNAMA

HS ARA FAZ